

شماعة

كل القلوب مرضى
ووشوشكوا خدّاعة
أنا عشت طول العمر
ف مرضكوا سمّاعة
أسمع لأوجاعكوا
طب قلبي شاكي الوجع
ليه قولتوا دي إشاعة
أنا عشت في حياتكوا
بالظبط شماعة
بتشيل في أحزانكوا
دلوقتي زاد الحمل
دلوقتي بقى فينكوا ؟
قولولي مين منكوا

هيكونلي شماعه
مين فيكوا سماعه
تتحط على قلبي
تسمع في أوجاعه
أنا قلبي ساع الكل
ولا حد فيكوا ساعه
كل البشر حواديت
وأنا عشت أسمع بس
ولا مرة ليكوا حكيت
أنا أصلي كنت نسيت
إنى بشر وبحس
ولا حد فيكوا حس
أنا قلبي أصله عبيط
وإنتوا قلوبكوا جبس